

Te tono kia uru mai he mema poari



Ka āhei tō poari kia kōwhiri me ka tonoa ētahi mema tāpiri kia uru mai ki tō poari.

He tino ara pai tēnei mō te whakahaere āputa i te tēpu poari, pēnei i ngā pūkenga, i ngā ira, me te kanorau momo iwi.

E kore e taea e koe te tono kia uru mai tētahi tangata kia whakakā pūmautia he tūranga wātea pokerehū i muri i te wehenga atu o tēnei mea te mema i āta pōtitia, i tō poari.

He hātepe mō te whakakā i ngā tūranga wātea pokerehū e tika ana kia whāia.

Me pānui koe i ētahi kōrero mō te whakakā i ngā tūranga wātea pokerehū i te wāhanga [Ngā pōti, ngā Tūru Wātea & Te Whakamahere Pikinga Tūranga](#) o tō mātou Pūtahi Rauemi.

Kia mārama: E kore e taea e tētahi poari kura kāwanatanga haumi te tono tangata kia uru mai hei mema, ki te kore te rangatira e whakaae kia tukua rawatia e ia tētahi o ana tūranga i te tuatahi.

Ka taea hoki e tētahi poari kura kāwanatanga haumi te whakapiki te rahi o ngā kanohi o ngā mātua kia pai ai te whakatū tūranga mō tētahi tangata i tonoa kia uru atu.

He aha tēnei mea te mema i tonoa kia uru mai?

Ko tēnei mea te mema i tonoa kia uru mai he mema tūturu nō tō poari kura.

He taurite tonu te mana, te reo, te mana pōti me te noho haepapa ki ērā mema katoa atu.

Me mātua waitohu e ia te puka whakaatu māraurau i mua i te whakatau a tō poari kia tonoa kia uru mai.

Me pupuru e tō poari tēnei puka ki ōna kōnae.

Ka taea rātou te tono kia uru ki te poari mō tētahi wāhanga toru tau, tētahi wā poto iho rānei mehemea e hiahia ana.

Ina whakatau take kia tonoa tangata kia uru mai, me mātua whakarite e tō poari he rā motuhake e mutu ai te nohonga mai hei mema (i roto i te wā 3 tau te roa).

Ki te kore tō poari e kōwhiri i tētahi rā whakamutunga, ka wehe atu te mema i tonoa e 3 tau i muri i tana pikinga ki te tūru.

Ka rerekē pea tēnei wātaka i ērā o ngā mema poari i āta pōtitia, ā, ka rerekē pea te āhua, arā, ka noho i te tūru ahakoa kua wehe atu ngā mema i āta pōtitia (hei te pōtitanga).

Rite tonu ki ngā mema poari katoa, me pōti rātou kia tino puta he painga mō te kura me ōna pānga, ōna ākonga me ōna kaimahi.

Ka taea hoki ngā mema i tonoa kia uru atu te piki ki te tūranga o te mema arataki.

E hia ngā mema i āta tonoa ka taea e koe?

Kei te āhua me te turepapa o tō poari te maha o ngā mema i tonoa kia uru mai e whakaaetia ana.

Kia nui kē atu ngā kanohi o ngā mātua i te tapeke katoa o ngā mema i tonoa kia uru mai me ngā mema poari i kopoua, huia katoatia.

Kotahi anake te wā ka āhei koe kia nui atu ngā mema i kopoua/tohua i tō poari, ko ērā ka taea te kī, he tūranga wātea i reira mō tētahi kanohi o ngā mātua. He mea taupua noa tēnei.

Mō ētahi atu mōhiotanga, tirohia tā mātou [aratohu ki te anga poari](#), ā, me whakapā mai hoki ki a mātou i mua i te mahi panonitanga.

Ka āhei tētahi poari kura kāwanatanga haumi te tono kia uru mai he mema poari?

Mō te nuinga, tokorima ngā kanohi o ngā mātua, tokowhā hoki ngā kanohi o te rangatira o tētahi poari kura kāwanatanga haumi.

Nā te mea ko te ture kia nui kē atu ngā kanohi o ngā mātua i te tapeke katoa o ngā mema i tonoa kia uru mai me ngā mema poari i kopoua, huia katoatia, i te nuinga o te wā, kāore he tūranga wātea mō te tangata ka tonoa kia uru atu.

Tērā pea i panonitia te turepapa o tētahi poari kura kāwanatanga haumi i runga i te whakaaetanga a te rangatira, i muri i te whakamananga turepapa hou rānei.

Me he rangirua, tēnā whakapā mai.

Mehemea kāore i te wātea te tono kia uru atu he tangata, ka taea e tō poari te:

- Tono ki te rangatira kia kopoua tētahi tangata ina tūpono wātea mai he tūranga mō tētahi tangata ka kopoua e te rangatira.
- Tono ki te rangatira kia whakahekea te maha o ngā tāngata i kopoua e taua rangatira.
- I runga i ngā kōrerorero tahi ki te hāpori o tō kura, te whakapiki te maha o ngā tūranga mō ngā kanohi o ngā mātua i tō poari.

Me pēhea tō poari e tono ai i tētahi mema kia uru mai?

Kia oti tō whakaū ka āhei koe ki te tono tangata kia uru mai hei mema, me whakamana mōtini tō poari.

Me maumahara ki te tuhi i ngā take i kōwhiri ai tō poari ki te tono tangata kia uru mai ki ngā meneti o tō hui, he pēhea hoki te roa o te wā mō te tangata i tonoa rā.

He mea pai hoki kia āta tuhia te roa o te wā o te tūranga i te rēhita mema poari.

Kāore he ara tika, he ara hē rānei mō te whakahaere i tō hātepe tono tangata.

Ko tā ētahi poari he tono mō ngā whakaaturanga hiahia, me te uiui ki ngā kaitono i mua i te whakatau.

Ko tā ētahi atu he ōpaki noa te hātepe, ka haere ki te inoi ki tētahi tangata kia piki ki te tūranga.

Me whakakī te tangata ka kōwhiria e koe i te [whakaatu māraurau](#) i mua i te whakataunga.

Kātahi ka whakaaetia tētahi mōtini e tō poari kia tono i te tangata kia uru mai.

Ka piki ia ki te tūranga i muri tata tonu iho i te whakatau a te poari ko wai ka tonoa kia uru mai.

Me whakahou tō [rēhita mema poari](#) me te whakakī i te puka [Ngā Whakahoutanga Poari Kura](#)

Me mātua whakarite e koutou he whakangungu mō tō mema poari hou, me te whakamōhio i a ia ki tō hapori kura.

Ngā pātai pea mā te poari

- Kua whakaūngia e tātou ka āhei tātou te tono tangata kia uru mai hei mema poari?
- He aha tātou e hiahia ai ki te tono tangata kia uru mai?
- Kia pēhea te roa o te wā o tō tātou mema i tana tūranga?
- Kua whakaae tātou ki tētahi mōtini kia pēnei, kua āta tuhia hoki?
- Ka pēhea tā tātou whiriwhiri tangata kia tonoa kia uru mai hei mema?
- Kua whakakīa e tā tātou tangata i kōwhiri ai te [puka whakaatu māraurau](#)?
- Kua whakahoutia tā tātou [rēhita mema poari](#), ā, kua whakakīa hoki te puka [Ngā Whakahoutanga Poari Kura](#)?
- Kua whakaritea e tātou he whakangungu mō (t)ō tātou mema poari hou?
- Kua whakamōhiohia tō tātou hapori kura?

Ngā tauira, ngā rauemi me ngā tohutoro

Pāwhiritia te (ngā) hononga i raro iho nei kia uru ki ngā tatauirā, ngā rauemi me ngā tohutoro o tēnei kaupapa.

Kei te āhua tonu o tō pūrere, ka tīkina ake, ka tuwhera rānei i tētahi atu pūtirotiro.

He hononga mai i a mātou

- [Rēhita mema poari](#)
- [Ngā pōti, ngā Tūru Wātea & Te Whakamahere Pikinga Tūranga](#)
- [Aratohu ki te anga poari](#)

Te paetukutuku pōtitanga poari kura

- [Ngā paearu māraurau](#)
- [Whakaatu māraurau](#)

Te Tāhuhu o Te Mātauranga

- Te puka mō [Ngā Whakahoutanga Poari Kura](#)

Te Ture mō te Mātauranga me te Whakangungu 2020

- [Rārangi kaupapa 23 – Te pōti me te inoi mema poari mō ngā poari o ngā kura Kāwanatanga, te roa o ngā tūranga o ngā mema poari, me te māraurau](#)